

# ESTATUTS CLUB ESQUÍ VAL D'ARAN

## CAPITOL I: PRINCIPIS GENERAUS.

### **Article 1.**

Eth Club d'Esquí Val d'Aran ei ua entitat privada constituïda en data 26 de hereuèr de 1965, formada per persones fisiques, damb responsabilitat juridica pròpria e capacitat d'obrar. Eth sòn nòm abreujat ei C.E.V.A. e eth sòn escut ei ua estela de nhèu damb era crotz dera Val d'Aran en centre. A coma objectiu eth foment e era practica contunhada der espòrt e, en conseqüència, des activitats fisiques e esportives avientes, sense cap fin de lucre. Practicarà er esquí coma principau modalitat esportiva e serà afiliat ara Federació Catalana d'Esports d'Hivern.

### **Article 2.**

Eth domicili social deth Club d'Esquí Val d'Aran s'establís en Vielha (Lleida), Avda. Garona 33, Locau 9, Palai de Gèu. Eth locau non ei pas de propietat. En cas de canviament d'aguestes donades se comunicarà ath Registre d'Entitats Esportives dera Secretaria General de l'Espòrt e ara Federació Catalana d'Esports d'Hivern.

### **Article 3.**

Eth CEVA practicarà principauments es espòrts d'iuèrn, que contempen es següentes modalitats.

A - ESPÒRTS DE NHÈU

B - ESPÒRTS DE GÈU

C - ESPÒRTS DE LUJA

Aguestes modalitats comprenen es següentes disciplines :

A - ESPÒRTS DE NHÈU

- 1.- Esquí Aupin
- 2.- Esquí Artistic (Freestyle)
- 3.- Esquí de Hons
- 4.- Sauts d'Esquí
- 5.- Surf de Nhèu (Snowboard)
- 6.- Telemark

## B - ESPÒRTS DE GÈU

- 1.- Oquei Gèu
- 2.- Patinatge Artistic sus Gèu
- 3.- Patinatge de Velocitat sus Gèu
- 4.- Curling

## C - ESPÒRTS DE LUJA

- 1.- Bobs
- 2.- Luge
- 3.- Luja damb cans

Era Junta Directiva poderà acordar era creacion de naues seccions entara practica d'aites modalitats esportives. Aquesta decision serà ratificada pera Assemblea Generau deth Club e comunicada ath Registre d'Entitats Esportives en sòn moment.

### **Article 4.**

Es activitats fisiques e esportives non demoren pas subjèctes en un encastre territorial determinat, sense prejudici dera Sedença Social, que radique ena Val d'Aran atau coma er encastre principau d'actuacion deth Club.

### **Article 5.**

Er aranés ei era lengua oficiau deth Club d'Esquí Val d'Aran.

### **Article 6.**

Eth CEVA se regís per principis democratics e representatius, e era sobeiranetat plea residís ena Assemblada Generau. Eth Club d'Esquí Val d'Aran se regís pera lei 8/1988 de l'Esport de Catalunya,

per autes disposicions que la despleguen e peth Decrèt 70/1994 de 22 de març. Se regís, tanben, pes sòns estatuts e pes reglaments intèrns de desplegament aprovadi pera Assemblea Generau e subsidiàriaments son d'aplicacion es nòrmes reguladores dera Federació Catalana d'Esports d'Hivern.

Era Federació Catalana d'Esports d'Hivern, actuauments ei organizada en 4 delegacions territoriaus d'encastre comarcau, per decision dera Assemblea Generau, e laguens d'aguesta Organizacion Territoriau eth Club d'Esquí Val d'Aran hè part dera Delegacion Territoriau Val d'Aran.

## **CAPITOL II: ES SÒCIS**

### **Article 7.**

Son sòcis deth Club d'Esquí Val d'Aran es persones fisiques que, en tot auer sollicitat era admission mejançant eth procediment reglamentari an estat acceptades pera Junta Directiva. Es sòcis poderàn èster des classes següentes: numèraris, d'aunor e aspirants.

1. Son sòcis numèraris totes es persones majors d'edat que, en tot auer estat admetudi coma socis, son ath corrent de pagament des quòtes establides reglamentàriaments. Seràn sòcis d'aunor aqueres persones a qui l'Assemblea Generau conferisque aguesta distincion e auràn un lòc de preferéncia enes actes oficials dera Entitat. Eth sòci d'aunor serà exemptat de quinsevolh tipe de quòta. Es sòcis de mens de dètz-e-ueit ans seràn qualificadi coma sòcis aspirants e auràn dret ar usatge des installacions e servicis sociaus mejançant era quòta que fixe era Junta Directiva. Passaràn automaticaments a èster sòcis numèraris en complir era majoria d'edat. Era Junta Directiva pòt prepausar era creacion d'autes tipus de sòcis, era sua aprobacion e es condicions pes que les calerà regir, corresponderàn ara decision dera Assemblea Generau.
2. Er expedient d'ingrès d'un sòci consistirà basicaments en un escrit de sollicitud damb es donades personaus deth sòci.
3. En cas de non compliment des obligacions deth sòci, se poderà acordar damb caractèr temporau, era suspension dera condicion de sòci, e calerà que

sigue comunicada de forma fidedigna ar interessat. Era condicion de sòci serà recuperada quan demoraràn restablèrtes es condicions non acomplides.

**4.** Era condicion de sòci se pèrd:

- a.** Per voluntat pròpria comunicada formauments per escrit ara Junta Directiva.
- b.** Per acòrd dera Junta Directiva basat enes fautes de caractèr fòrça grèu, damb audiéncia prealabla ar interessat e era corresponenta dubertura d'expedient disciplinari.

**5.** Es sòcis numèraris an es drets següents:

- a.** Participar damb votz e vòt ena l'Assemblea Generau.
- b.** Èster electors e elegibles entàs cargues des Organs de Govèrn deth Club.
- c.** Participar e gaudir des activitats esportives, recreatives e culturaus organizades peth Club.

**6.** Son obligacions des sòcis:

- a.** Pagar es quòtes d'entrada, es quòtes periodiques, derrames o quinsevolha auta qu'establisquen es Organs de Representacion o de Govèrn.
- b.** Complir es estatuts dera Entitat, es reglaments intèrns e es acòrds des Organs de Representacion o de Govèrn adoptadi validaments en encastre des sues competéncies.
- c.** Contribuïr ath compliment des activitats dera Entitat, autant esportives coma de participacion enes Organs Directius, Consultatius o de Govèrn, quan sigue de besonh.
- d.** Facilitar un domicili entath liurament des comunicacions dera Entitat e notificar es cambiaments d'aguesta adreça.

## **CAPITOL III: ESTRUCTURA ORGANICA: ORGANS DE GOVERN E REPRESENTACION**

### **Article 8.**

**1.** Son Organs de Govern e Representacion deth Club d'Esquí Val d'Aran:

Era Assemblea Generau.

Era Junta Directiva.

**2.** Era Assemblea Generau ei er Organ Superior de Govern deth CEVA e es sòns acòrds son vinculanti entà toti es sòcis e entara Junta Directiva.

**3.** Intègren era Assemblea Generau toti es sòcis numèraris majors d'edat que non agen pas suspenuda era condicion de sòcis ath moment dera convocacion. Eth dret e era obligacion des sòcis de participar as assembleades ei personau e non se pòt pas delegar.

**4.** Era Assemblea Generau pòt èster ordinària o extraordinària. Ei Ordinària l'Assemblea que per nòrma se celebre un còp ar an entà conéisher e aprovar, aumens, es matèries següentes: memòria des activitats realizades, liquidacion der exercici vençut e pressupòst der exercici economic següent. Son Extraordinàries totes es autes Assemblees que se convoquen ath long deth cors der exercici.

**5.** Era Assemblea Generau, ath delà des competències mencionades en article anterior, ei er organ maximal dera Entitat e a competència especiau enes matèries següentes:

**a.** Fixacion der impòrt des quòtes ordinàries e d'entrada, exceptat qu'era modificacion age unicaments era fin de restablir era sua valor, e damb aplicacion coma maximom deth percentatge de variacion der indèx generau de prètzi ath consum (IPC) dempús dera darrèra modificacion.

**b.** Establiment de quòtes extraordinàries o derrames.

**c.** Aqueriment, venta o gravamen des bens mòbles o immòbles dera Entitat, se era sua valor excedís eth 20% deth pressupòst annau der exercici.

**d.** Regim disciplinari.

- e. Prepauses qu'era Junta Directiva acòrde sométer ara Assemblea.
- f. Prepauses qu'es sòcis volguen presentar ena Assemblea, cada viatge qu'agen eth supòrt deth 5% des sòcis numèraris deth Club.
- g. Modificacion des estatuts.
- h. Prepausa de fusion o segregacion deth Club.
- e. Dissolucion deth Club.

### **Article 9.**

1. Era convocatòria des Assemblees la cau hèr per acòrd dera Junta Directiva, a instància pròpria o se atau ac demanen un minim d'un 10% des sòcis numèraris. En aquest darrèr cas, dempús deth dia dera sollicitud en fòrma des sòcis que la demanen, entara sua convocatòria, non pòden pas transcórrer mès de 30 dies.
2. Es Assemblees Generaus seràn validaments constituïdes en prumèra convocatòria quan i concorreràn era mitat des sòns membres, e en dusau convocatòria damb independéncia deth nombre d'assistents. Entre era prumèra e era dusau convocatòria les cau transcórrer 30 minutes.
3. Es acòrds les cau préner per majoria des presents en moment dera votacion, a excepcion d'aqueres matèries qu'age previst majoria qualificada, que serà de 2/3.
4. Era Assemblea Generau serà presidida per ua mesa integrada peth President e es auti compausants dera Junta Directiva, e actuarà coma secretari eth pròpri deth Club.

### **Article 10.**

1. Era Junta Directiva ei er Organ de Govèrn deth CEVA. A era foncion de promòir, dirigir e executar es activitats esportives deth Club e gerir-ne eth foncionament.
2. Era Junta Directiva deth CEVA ei formada per sòcis numèraris damb un minim de 3 persones. Un serà eth President, un aute eth Secretari e un tresau eth Tresorèr, e eth maximal serà de 21 persones. Aquestes auràn d'amassar aumens es requisits següents: èster major d'edat civiu e non auer pas

suspenuda era condicion de sòci en moment dera convocatòria.

**3.** Correspon ath President era representacion legau deth Club. Eth President poderà delegar era sua representacion entà tèmes concrèts en membre deth Conselh qu'estime oportun.

**4.** Eth Tresorèr ei eth depausitari deth Club, e li correspon signar es arrecebudi, autorizar es pagaments e portar es libres de compdes, sense perjudici des competéncias que poguen correspóner ath President e ath balanç de situacion e es compdes d'ingrèssi e de despenses, que cau méter en coneishença de toti es sòcis.

**5.** Ath Secretari li correspon encarregar-se der archiu de documentacion, de redigir es documents qu'afècten era marcha administrativa deth Club, e portar eth libre de registre de sòcis e eth libre d'actes.

**6.** Era assignacion des cargues dera Junta Directiva, lheuath deth de President, se harà entre es sòcis qu'intègren era Junta, en tot deishà'c ara decision deth President.

**7.** Ei competéncia dera Junta Directiva: era admission, suspension o pèrta dera qualitat de sòci; era convocatòria des Assemblees, era convocatòria d'eleccions entà provedir es cargues dera Junta Directiva; era presentacion entara Assemblea Generau der infòrme o era memòria sus es activitats dera Entitat, dera liquidacion der exercici economic damb eth balanç e eth compde de resultats, e eth pressupòst e era programacion entar exercici següent.

**8.** Era eleccion des membres dera Junta Directiva se realize per un periòde minim de 6 ans e non superior a 8 ans. Toti es cargues directius son reelegibles sense limitacion temporau e es renauiments son totaus. Es membres dera Junta Directiva son responsables dera sua accion deuant dera Assemblea Generau. En cap cas non pòden pas auer compensacion economica.

Era Junta ei convocada peth sòn President a iniciatiua pròpria o a peticion d'un tèrç des sòns membres e, aumens, realize ua amassada per trimesadèr. Serà validament constituïda quan i seràn presents era mitat des sòns membres.

Correspon ath Secretari hèr eth compde rendut des amassades dera Junta Directiva. Quinsevolh membre dera Junta pòt exigir que demore rebutat ena acta eth vòt en contra que poguen eméter contra un acòrd e era sua explicacion de vòt, de forma breu.

## **CAPITOL IV: PROCEDIMENT ELECTORAU**

### **Article 11.**

Es membres dera Junta Directiva se provedissen mejançant sufragi liure, dirècte, parièr e secrèt entre es sòns sòcis damb dret a vòt.

### **Article 12.**

Son electors e elegibles es sòcis numèraris damb es condicions següentes: èster major d'edat, auer antiquitat coma sòci d'un an e non auer pas suspenuda era condicion de sòci en moment dera convocatòria.

### **Article 13.**

Eth procediment electorau s'a d'ajustar as fases següentes:

1. Convocatòria d'eleccions e constitucion dera Junta Electorau, e aprobacion deth cens electorau.
2. Presentacion e proclamacion de candidatures.
3. Realizacion dera eleccion, escrutinh e proclamacion de guanhadors. Entre eth dia dera convocatòria des eleccions e eth dia dera realizacion les cau transcórrer un minim de 30 dies abils e un maximal de 60.

### **Article 14.**

Era convocatòria d'eleccions correspon ara Junta Directiva. Er acte des votacions pòt hèr-se a coïncidir damb ua Aassemblea Generau o tanben realizar-se independentaments.

### **Article 15.**

Era convocatòria d'eleccions per finalizacion naturau deth mandat se harà laguens des darrèri 6 mesi dera sua vigéncia, e tostemp damb era anticipacion de besonh pr'amor qu'era eleccion se hèsque abantes que acabe eth mandat.

### **Article 16.**

Era Junta Directiva harà publica era convocacion d'eleccions mejançant era anóncia ena prensa d'ampla difusion locau o per remesa dirècta as sòcis e, en



tot cas, s'harà publica en panèu d'anóncies deth Club. Egalaments ei de besonh comunicar era convocacion d'eleccions ara Federació Catalana d'Esports d'Hivern.

#### **Article 17.**

Era convocacion d'eleccions a d'informar aumens deth següent: nombre de lòcs que cau providir, cargues, condicions entà èster elector e candidat, dia e lòc de designacion des compausants dera Junta Electorau, termini d'exposicion deth cens electorau e reclamacions entara presentacion de candidatures, dia e lòc des eleccions e orari de dubertura deth collegi electorau e forma d'acreditacion d'electors.

#### **Article 18.**

Simultanèaments ar acòrd de convocacion d'eleccions, ara Junta Directiva li cau disposar era constitucion dera Junta Electorau, qu'a d'èster integrada per 3 membres e 3 suplents.

#### **Article 19.**

Laguens es dus dies següents ara sua designacion, as compausants dera Junta Electorau les cau préner possession deth cargue, constituïr-la formauments, e elegir-ne eth President.

#### **Article 20.**

Correspon ara Junta Electorau: conéisher e resòlver es reclamacions pendent eth procès, l'admission e eth refús des candidatures, proclamar-les, decidir incidents e, en generau, conéisher e resòlver es reclamacions que presenten es sòcis o candidats, e publicar e comunicar es resultats.

#### **Article 21.**

Es reclamacions deuant dera Junta Electorau les cau hèr en un termini maximal de 3 dies, dempús que s'age produsit er hèt objècti d'impugnacion. Era resolucion dera Junta, que serà executiva, la cau dictar laguens des 3 dies següents. Contra es acòrds dera Junta Electorau pòt interpausar-se recors d'auçada deuant eth Comitè Jurisdiccional dera Federació Catalana d'Esports

d'Hivern o, se manque, deuant eth Comitè de Disciplina Esportiva, en un termini de 3 dies.

**Article 22.**

Es candidatures an d'includir eth nòm des sòcis candidats , dirigides peth candidat tà President.

**Article 23.**

Se se presente o siguesse valida sonque ua unica candidatura, era Junta Electoral procedirà dirèctaments ara proclamacion des sòns compausants coma elegidi entara Junta Directiva.

**Article 24.**

Se non se presente cap de candidatura o non ei pas valida cap des presentades, era Junta Electoral ac a de comunicar ara Junta Directiva o ara Comission Gestora, organ qu'aurà de convocar naues eleccions en un termini maximal de tres mesi.

**Article 25.**

Era realizacion des eleccions s'aurà d'amiar a tèrme 20 dies dempús dera proclamacion des candidatures.

**Article 26.**

Era acta de proclamacion dera candidatura guanhadora s'aurà de comunicar mejançant certificacion, laguens des 3 dies següents, ara Junta Directiva, ara Federació Catalana d'esports d'Hivern e ath Registre d'Entitats Esportives.

**Article 27.**

Es candidats elegidi preneran possession laguens es 5 dies següents ara sua eleccion.

**Article 28.**

Eth cessament de compausants dera Junta Directiva se produsís, s'ei eth cas, pes causes següentes:

- Acabament deth mandat naturau peth que sigueren elegidi.
- Pèrta dera condicion de sòci deth Club.

- Pèrta de quinsevolhe des condicions entà èster elegit.
- Mòrt o incapacitat qu'empedisque er exercici deth cargue.
- Decision disciplinària executiva que inabilite entà aucupar bèth cargue des Organs de Govèrn o Representacion deth Club.
- Aprobacion d'un vòt de censura.

#### **Article 29.**

Era suspension deth mandat coma membre dera Junta Directiva se produsís pes causes següentes:

- Sollicitud der interessat quan i concorreràn circumstàncies qu'ac justifiquen e ac apròve era Junta.
- Suspension dera condicion de sòci.
- Temps que dure era instrucció d'un expedient disciplinari a un des sòns compausants, s'atau ac acòrde era Junta Directiva.
- Inhabilitacion temporau, acordada per decision disciplinària.

#### **Article 30.**

En cas de suspension o cessament deth President, a d'exercir es sues funcions eth Sots-president Prumèr. En cas d'abséncia d'aguest, serà substituït peth Sots-president Dusau e, en eth cas dera sua abséncia, peth membre dera Junta damb mès antiquitat coma sòci.

#### **Article 31.**

En cas d'existir vacantes ara Junta Directiva, pr'amor que non s'a provedit era totalitat des cargues o peth cessament o suspension de bèth un des sòns compausants, tostemp e que non afècte eth cargue de President, era provision transitòria de vacanta que li cau requèir tostemp sus sòcis qu'agen era consideracion d'elegibles entath cargue a providir, e solament peth temps que rèste de mandat ath cargue, se delegue ara Junta Directiva, e era decision li calerà èster ratificada ena pròplèu Assemblea Generau.

## **CAPITOL V: REGULACION DETH VÒT DE CENSURA**

#### **Article 32.**

Entà que se pogue sollicitar un vòt de censura contra eth President deth Club, era totalitat dera Junta, o quinsevolhe des sòns membres, cau qu'ac demane per escrit motivat pera majoria des membres dera Junta o, aumens, eth 25% des sòcis deth Club.

### **Article 33.**

Un còp presentada era sollicitud de vòt de censura, laguens des 10 dies següents cau constituïr ua mesa de 5 persones formades per 2 membres dera Junta Directiva designadi per aguesta, es 2 prumèrs sòcis signants dera sollicitud e coma President qui delègue ar efècte era Federació Catalana d'Esports d'Hivern.

### **Article 34.**

Un còp verificada era adequacion dera sollicitud as requisits soslinhadi en prumèr punt, ara Junta Directiva li cau convocar er acte dera votacion que calerà celebrar en un termini non pas inferior a 10 dies ne superior a 20 dies. Era convocacion s'aurà d'ajustar as condicions estatutàries entara convocacion d'assemblees.

### **Article 35.**

Eth vòt de censura sonque lo pòt acordar era majoria absoluta (50% + 1) deth numèro de sòcis damb dret a vòt dera Entitat.

### **Article 36.**

Un còp acordat eth vòt de censura, eth President, era Junta Directiva o es membres a qui afècte cessaran automaticaments.

### **Article 37.**

- En cas qu'eth vòt de censura afècte ath President, aurà d'exercir es sues foncions eth Sots-president Prumèr, en sòn defècte eth Sots-president Dusau, e en sòn defècte eth membre dera Junta damb mès antiquitat coma sòci deth Club.
- En cas qu'eth vòt de censura afècte as membres dera Junta, mès non pas ath President, aguesti an d'acordar era provision transitòria des

cargues corresponents, decisió que li cau èster ratificada ena primèra Assemblea Generau que realize eth Club.

- Se eth vòt de censura afècte a mens deth 50% des membres dera Junta Directiva, en tot includir-i eth President, correspon as membres non pas afectadi decidir era provision transitòria de vacantes, decisió que li cau èster ratificada ena primèra Assemblea Generau que realize eth Club.
- Se eth vòt de censura afècte a més deth 50% des membres dera Junta Directiva, en tot includir-i eth President, ara Assemblea Generau li cau decidir entre providir transitòriaments es vacantes sonque peth temps que rèste de mandat, o constituïr ua comission gestora damb objecti de convocació de naues eleccions.

## **CAPITOL VI: REGIM ECONOMIC I DOCUMENTAL**

### **Article 38.**

#### Regim economic

1. Er auviatge constitutiu deth CEVA rèste integrat pes aportacions inicials des sòcis fundadors e ei de 120 èuros.
2. Eth CEVA se somet a regim de pressupòst e auviatge pròpri, damb es limitacions legaus que corresponen. Er objectiu principau des bens de que dispòse ei eth foment e era practica des activitats esportives deth Club e es possibles rendes s'auràn d'aplicar ara conservacion e eth desenvolopament des sòns objectius socials, sense que en cap moment poguen repartir-se beneficis entre es sòns associadi e directius.
3. Era Junta Directiva a era facultat de disposicion economica deth Club damb eth limit deth totau de despenses previstes en pressupòst annau, damb ua variacion maximala deth 20%. En cas que calgue superar aguesta quantitat, s'establís coma nòrma era convocacion d'ua Assemblea Generau entà qu'autorize eth pressupòst complementari.
4. Era Assemblea Generau sonque pòt autorizar ara Junta Directiva er aquesiment, eth gravamen, era alineació de bens o acceptar sòs eth credit o prèstec pendent er exercici, enquia un impòrt conjunt que non excedisque eth 20% deth pressupòst d'ingrèssi. Entà excedir aquest limit

cau qu'era prepausa sigue aprovada pes 2/3 parts des assistents ara Assemblea. Non se pòt pas autorizar era emission de títols de deute que siguen garantidi per parts alíquotes patrimonius en favor des sòcis deth Club.

5. Era emission de títols transmissibles representatius de deute, o era alienacion, o eth gravamen de bens immòbles era valor des que n'excedisque eth 20% deth pressupòst d'ingrèssi aprovadi entar exercici, les cau tractar ena Assemblea Generau e les cau èster aprovadi pes 2/3 parts des assistents.
6. Quan se tractarà de préner sòs a prèstec es quantitats superiores ath 50% deth pressupòst annau tanben en eth supòsit d'emission de títols de deute, ei obligatòri er infòrme favorable dera Secretaria General der Esport de la Generalitat de Catalunya.
7. Eth producte obtengut dera alienacion des installacions esportives e des terrenes en que se trapan, s'a d'invertir integralaments en aquesiment, bastiment e melhora de bens dera madeisha aplicacion, segontes es objectius esportius deth Club, exceptat que i age informe favorable dera Secretaria General de l'Esport.

#### **Article 39.**

##### Règim documental

Intègren eth regim documentau e comptable:

- Eth libre d'actes.
- Eth libre de registre de sòcis.
- Es libres de comptabilitat.
- Es balanci e i compdes de resultats e era memòria economica.

## **CAPITOL VII: REGIM DISCIPLINARI**

#### **Article 40.**

Eth regim disciplinari esportiu s'esten a conéisher es infraccions des nòrmes de jòc o competicion, dera conducta esportiva o des nòrmes de conducta associativa.

#### **Article 41.**

Era potestat disciplinària conferís as sòns titulars era possibilitat de reprimir o sancionar es sòcis, afiliadi, esportistes, tecnicos e directius.

#### **Article 42.**

Er exercici dera potestat disciplinària correspon:

- As jutges o àrbitres.
- Ara Junta Directiva.
- Ara Assemblea Generau de sòcis.

#### **Article 43.**

1. Contra es decisions definitives se pòt interposar recurs:
  - Deuant dera Junta Directiva, quan se tractarà d'infraccions as regles de jòc o competicions esportives. Contra aquesta resolucion non ei pas possible cap aute recurs.
  - Deuant era Assemblea Generau quan se tractarà de sancions disciplinàries qualificades coma grèus o fòrça grèus, per infraccions relatives ara conducta esportiva o per incompliment des prescripcions estatutàries o reglamentàries imposades pera Junta Directiva.
2. Per miei deth reglament de regim interior, aprovat pera Junta Directiva e ratificat pera Assemblea Generau, s'establís un regim tipificat de sancions, atau coma es procediments disciplinaris d'aplicacion e de recursi de conformitat damb era legalitat en vigor. Subsidiàriaments ei d'aplicacion eth regim disciplinari previst ena Lei 8/1988 der espòrt.

### **CAPITOL VIII: REFORMA DES ESTATUTS**

#### **Article 44.**

Es estatuts pòden èster modificadi o reformadi per acòrd dera Assemblea Generau convocada ar efècte mejançant votacion favorabla des 2/3 parts des sòcis assistents.

## **CAPITOL IX: CAUSES D'EXTINCION O DISSOLUCION**

### **Article 45.**

Eth CEVA se pòt extinguir per resolucion judíciau, per fusion o absorcion en autes associacions e clubs, pera cancellacion dera sua inscripcion arth Registre d'Entitats Esportives e pes autes causes previstes en ordenament juridic. Excepcionalaments, eth CEVA se pòt dissòlver per acòrd adoptat ena Assemblea Generau convocada as efèctes per ua majoria de 2/3 parts des sòcis assistents, e tostemp que represente era majoria deth totau des sòcis damb dret a vòt.

### **Article 46.**

Dissolvut eth Club, eth remanent deth sòn auviatge sociu, se n'i a, revertirà ara collectivitat e calerà comunicar aguesta dissolucion ara Secretaria General de l'Esport, pr'amor qu'acòrde era destinacion des bens entath foment e desenvolopament des activitats fisico-esportiuas laguens dera Val d'Aran.

## **DISPOSICIÓ FINAL OBLIGATÒRIA**

Demoren abolidi es estatuts deth Club d'Esqui Val d'Aran, en vigor enquia ara.